

Peniaga barang lusuh jalankan perniagaan tanpa lesen didenda RM1,000

SIBU: Seorang peniaga barang lusuh dijatuhi hukuman denda RM1,000 atau penjara sebulan oleh Mahkamah Majistret di sini semalam atas pertuduhan menjalankan perniagaan tanpa lesen.

Majistret Mohd Syukri Mokhtar menjatuhkan hukuman itu setelah mendengar pengakuan bersalah serta rayuan tertuduh yang dikenali sebagai Wong Ing Chuong, 58.

Mengikut pertuduhan, Wong didakwa menjalankan perniagaan barang lusuh di sebuah premis di Jalan Rambutan pada 2 Ogos 2022, kira-kira jam 3.40 petang.

Bagi pertuduhan itu, dia didakwa mengikut Seksyen 6, Akta Peniaga Barang Barang Terpakai 1946 dan dihukum mengikut Seksyen 9, akta sama.

Di bawah seksyen ini memperuntukan hukuman denda

tidak lebih RM1,000 atau penjara sehingga tiga bulan atau kedua-duanya sekali.

Berdasarkan fakta kes, pengadu bersama dengan beberapa anggota polis telah memeriksa sebuah premis di Jalan Rambutan dan mendapati premis terbabit menjalankan aktiviti membeli barang lusuh tanpa lesen.

Pihak polis turut merampas tiga guni berisi tembaga, tiga guni tin aluminium, enam

guni komponen kenderaan, dua unit rim motosikal, dua unit bateri kenderaan, satu guni aluminium, satu alat penimbang serta wang tunai RM1,239.

Tertuduh dibebaskan setelah membayar denda yang dikenakan.

Pendakwaan kes dilakukan oleh Timbalan Pendakwa Raya Harvind Raja Gopal sementara tertuduh tidak diwakili.